



REVISTA SITUASAUN – SETEMBRU 2016

ASUNTU NE'EBÉ PRESIZA TAU ATENSAUN

- ▶ **Insidente Violénsia Liga ho Grupu Arte Marsiál (GAM) Sa'e Maka'as iha Dili iha fulan Setembru;**
- ▶ **Insidente Violénsia 2 Liga ba Eleisaun Lideransa Komunitária no Insidente 6 Liga ba Partidu Polítiku Akontese iha Fulan Setembru;**
- ▶ **Hadau Malu Bee-Moos Nafatin Sai Númeru Aas iha Fulan Setembru.**

INSIDENTE VIOLÉNSIA LIGA HO GRUPU ARTE MARSIAL SA'E MAKA'AS IHA DILI IHA FULAN SETEMBRU

Belun ho nia Sistema Atensaun no Responde Sedu (AtReS) iha Setembru 2016 rekolla insidente violénsia hamutuk 134. Husi númeru ne'e rejista insidente 13 mak iha relasaun ho grupu arte marsiál no númeru ne'e sa'e maka'as tanba kompara ho númeru average (*rata-rata*) iha fulan 12 ikus (Setembru 2015 to'o Agostu 2016) rejista insidente 4.5 kada fulan.

Iha Munisipiu Dili, insidente 11 mak akontese tanba asalta malu entre grupu arte marsiál, husi insidente violénsia 49 ne'ebé akontese iha Setembru. Insidente sira ne'ebé iha relasaun ho GAM mak hanesan: Insidente 4 akontese tuituir malu iha Aldeia Zero Tres, Suku Mascarinhas iha kalan, ne'ebé sira tuda malu no baku malu, ne'ebé estragu uma balun no halo comunidade pániku; Insidente 2 akontese iha Aldeia Mate La Hotu, Suku Comoro ne'ebé rezulta uma balun no karreta nia vidru rahun; Insidente 2 akontese iha Aldeia Luloran, Suku Bairru-Pite ne'ebé membru GAM baku malu no tuda malu hodi rezulta ema na'in 2 kanek todan no 2 kanek kmaan, sunu uma 2 no motorizada 3; Insidente 3 akontese iha Área Raikotu, Aldeia Golgota, Suku Comoro ne'ebé rezulta joven 1 kanek tanba rama ambon kona iha kakorok, membru PNTL 1 kanek grave tanba fatuk kona iha ulun no ema na'in 2 kanek kmaan, inklui estraga uma no sasán balun.

Insidente 2 seluk ne'ebé iha relasaun ho grupu arte marsiál mak; insidente 1 akontese iha Aldeia Kaikasalari, Suku Tequenaumata, Postu Administrativu Laga, Munisipiu Baukau, ne'ebé insidente komesa ho disputa rai kontinua provoka malu no envolve membru GAM hodi asaltu malu no baku malu; insidente 1 seluk akontese iha Aldeia Riaheu, Suku Hatugau, Postu Administrativu Lete-foho, Munisipiu Ermera ne'ebé mane ida asalta mane ida seluk, no to'o ikus envolve comunidade sira hodi asalta malu, baku malu no tuda malu.

Totál Insidente Violénsia iha Setembru 2016	
Munisipiu	Insidente
Aileu	8
Ainaru	9
Baukau	13
Bobonaru	8
Covalima	3
Dili	49
Ermera	10
Lautein	1
Likisá	13
Manatutu	3
Manufahi	3
Oekusi	7
Vikeké	7
Totál	134

INSIDENTE VIOLÉNSIA 2 LIGA BA ELEISAUN LIDERANSA KOMUNITÁRIA NO INSIDENTE 6 LIGA BA PARTIDU POLÍTIKU AKONTESE IHA SETEMBRU 2016

Iha Setembru, rejista mós insidente violénsia 2 liga ba eleisaun lideransa komunitária. Insidente 1 akontese iha Sede Suku Uaitame, Postu Administrativu Uatolari, Vikeké, ne'ebé joven sira la konkorda ho nomeasaun ba meza ne'ebé atu prezide eleisaun Suku, nune'e sira tuda rahun Sede Suku no Sentru saúde. Insidente 1 seluk akontese iha Aldeia Horaikiik, Postu Administrativu Maubisse, Ainaru, ne'ebé grupu comunidade la konkorda xefe suku atuál re-kandidatu ba periodu tuir mai, nune'e sira haksasuk malu.

Akontese mós insidente 6 mak envolve militante partidu polítiku sira. Insidente 3 akontese iha Likisá (2 iha Bazartete no 1 iha Maubara), ne'ebé sira hemu tua hamutuk, hafoin diskute malu no baku malu liga ba partidu polítiku ne'ebé sira apoia; Insidente 1 akontese iha Ataúro, Dili, ne'ebé feto ida sai hanesan Brigada iha votasaun partidu ida nian, maibé feto ne'e ta'uk no halai bainhira haree nia maun; Insidente 1 akontese iha Suku Maina II, Lautein, ne'ebé sira hakilar malu tanba votasaun lideransa partidu; Insidente 1 akontese iha Laga, Baukau, ne'ebé partidu ida ba halo konsolidasaun no joven na'in 2 hanesan militante partidu seluk mós hakarak partisipa, nune'e sira baku tasak joven na'in rua ne'e.


HADAU MALU BEE-MOOS NAFATIN SAI NÚMERU AAS IHA FULAN SETEMBRU

Sistema AtReS mós rejista tan insidente violénsia hamutuk 9 liga ba problema bee-moos. Númeru ne'e hanesan ho insidente ne'ebé akontese iha fulan Agostu. Insidente ne'ebé akontese iha fulan Setembru konsidera sa'e maka'as kompara ho númeru average (*rata-rata*) durante fulan 12 ikus (Setembru 2015 – Agostu 2016) ho totál insidente 2.9 kada fulan. Númeru ne'e mós aas liu hafoin estabesele tiha Sistema AtReS iha fulan Feveiru tinan 2009.


Husi insidente 9 ne'ebé liga ba problema bee-moos, Insidente 4 akontese iha Dili, 1 iha Bedois, Suku Lahane Occidental, ne'ebé grupu feto baku feto 1 seluk to'o kanek iha oin tanba la fó fatin ba ema seluk kuru bee, insidente 1 akontese iha Benunuk, Metinaro ne'ebé comunidade estraga kanu bee tanba bee-moos la suficiente ba sira no insidente 2 iha Aldeia Luloran, Bairru-Pite ne'ebé to'o ikus da'et ba problema GAM. Insidente 2 akontese iha Baukau, iha fatin hanesan iha Aldeia Oralan, Vemasse, ne'ebé mane ida estraga bee ba fase ain, nune'e mane ida seluk hirus no baku kedas nia, depois loron tuir família rua mak halo asaltu ba malu to'o estraga sasán uma laran. Insidente 2 akontese iha Oesilo, Oekusi ne'ebé feto sira haksasuk malu no baku malu tanba hadau malu bee iha bee matan. Insidente 1 akontese iha Aldeia Saulidun, Suku Sau, Manatutu, ne'ebé feto sira hakilar malu tanba hadau malu bee iha fatin kuru bee.

KARATERÍSTIKA INCIDENTE


Total Incidente: Setembre 2016




Incidente Fatin




Metodu Violensia



Tipu Violensia




See Mak Hahu / Halo Violensia?




EMA NE'EBE HAHU VIOLENSIA NIA JENERU SAIDA?




VITIMA NIA JENERU




HUN NO ABUT KONFLITU



SEE MAK RESPONDE?



IMPAKTU



ATIVIDADE PREVENSAUN NO RESPONDE BA KONFLITU

Atividade Ne'ebé Hala'ó Husi Ekipa Sistema Atensaun no Responde Sedu (AtReS)

- ▶ Relasiona ho rezultadu monitorizasaun, insidente violénsia liga ba disputa rai kontinua rejista ho número aas, ho nune'e mak Ekipa Jestor AtReS inklui Diretór ONG Belun halo ona audiénsia ho Ministru Justisa Dr. Ivo Valente iha edifísio Ministériu Justisa Caicoli – Dili, iha loron 29 Setembru 2016, ho objetivu hodi fahe dadus insidente liga ba disputa rai, nune'e bele iha asaun resposta bazeia ba polítika Governu nian;



- ▶ Iha loron 28 Setembru, Jestor AtReS hasoru Diresaun Nasionál Prevensaun Konfliktu Komunitária (DNPKK) iha Ministériu Interior ho objetivu reforsa kooperasaun no hametin parseria, liu-liu rekolla dadus insidente violénsia no servisu hamutuk iha baze ho Belun nia Koordinadór Munisipiu no membru Rede Prevensaun no Responde Konfliktu (RPRK) iha Postu Administrativu 43. Liu husi enkontru ne'e entrega mós dadus monitorizasaun insidente violénsia ba Sra. Lidia Lopes hanesan Diretora Diresaun Nasionál Prevensaun Konfliktu Komunitária;



- ▶ Atu reforsa parseria no fahe informasaun liga ba dadus monitorizasaun insidente violénsia no mudansa situasaun, ekipa AtReS halo ona sorumutu ida ho Komandante Polísia Komunitária (Polkom) Polísia Nasionál Timor Leste (PNTL) Superintendente Asistente Sr. Antonio da Luz iha Kuartél Jerál PNTL Caicoli – Dili. Sorumutu ne'ebé realiza iha loron 27 Setembru 2016 ho objetivu atu reforsa kooperasaun iha baze liu-liu ho OPS sira iha Suku sira ne'ebé programa AtReS halo kobertura;
- ▶ Ekipa Belun halo audiénsia ho Vice Ministra Edukasaun ba Asuntu Ensinu Báziku no Pre-Eskolár Dra. Dulce de Jesus Soares ho objetivu hodi fahe dadus monitorizasaun ne'ebé identifika no rekolla dadus liga ba labarik estudante sira ho idade produtivu envolve iha violénsia hodi influensia mós ba joven sira seluk. Enkontru ne'e realiza iha loron 23 Setembru 2016 iha Ministériu Edukasaun Villa-Verde, Dili.



Atividade Ne'ebé Hala'ó Husi Ekipa Programa Apoiu Polisiamentu Komunitária (PAPK)

- ▶ ONG Belun liu husi Programa Apoiu Polisiamentu Komunitária (PAPK) hamutuk ho Komandu Polisia Munisipiu Manufahi fasilita ona enkontru ne'ebé envolve Feto Konsellu Polisiamentu Komunitária (FKPK) hodi fahe informasaun liga ba asuntu seguransa, liu-liu progresu no dezafiu ne'ebé maluk feto sira hasoru, inklui halo identifikasaun ba kestaun prioridade no oinsá mak bele halo prevensaun.

Enkontru hala'ó iha Edifísiu Komandu Munisipiu Manufahi, iha loron 15 Setembru 2016 ne'e, atu feto konsellu polisiamentu komunitária identifika no halo prevensaun ba kazu violénsia doméstika, kazu divórsiu no kazu inestu.

- ▶ Entretantu iha loron 16 Setembru 2016, Programa Apoiu Polisiamentu Komunitária (PAPK) hamutuk ho Komandu Polisia Munisipiu Manufahi fasilita mós Enkontru Konsellu Seguransa Munisipiu (KSM). Enkontru Konsellu Seguransa Munisipiu ne'e realiza ba dala-V ona iha Munisipiu Manufahi ho objetivu fahe informasaun liga ba situasaun durante periodu fulan Juñu – Agostu 2016, atu komponente relevante bele fó hanoin ba situasaun seguransa hodi nune'e bele garante estabilidade.



Atividade Ne'ebé Hala'ó Husi Ekipa Mediasaun no Rezolusaun ba Disputa Rai (MRDR)

- ▶ Fasilita mediasaun ba disputante iha Baukau ba parcela privadu ida, maibé laiha solusaun tanba parte rua hakarak halo uluk diskusaun iha família no tanba sira sei iha relasaun família. Rai ne'e lokaliza iha Suku Tirilolo, Postu Administrativu Baukau;
- ▶ Fasilita mediasaun iha Maliana ba rai privadu ida ne'ebé seidak iha solusaun tanba presiza hadi'a uluk relasaun família hafoin mak parte rua ko'alia kona-ba rai no ai-horis ne'ebé kuda iha rai nia leten. Rai ne'e lokaliza iha Suku Ritabou, Postu Administrativu Maliana.

KONA-BA REVISTA NE'E

Revista situasaun ne'e relata kona-ba asuntu xave relaciona ho insidente violénsia no tendénsia konfliktu husi koleasaun dadus monitorizasaun liuhosi Sistema Atensaun no Responde Sedu (AtReS), ne'ebé kobre iha Postu Administrativu 43, husi Postu Administrativu 65, Suku 208 iha Timor-Leste durante fulan Setembru 2016. Belun esforsu atu fahe informasaun ne'ebé up-to-date no serteza ho dadus atuál. Hanoin katak, bele hetan mudansa situasaun ho lalais husi kontribuisaun dame ita hotu nian. Ami agradese no simu informasaun seluk ne'ebé bele klarifika ka update dadus, liuhosi sistema AtReS.

Marilia Oliveira da Costa, Jestor Sistema AtReS: bylah.belun@gmail.com

Laurenius Lein, Espesialista Prevensaun Konfliktu & Polítika: laurenius.belun@gmail.com